

**МЕСЯЦА ИУНИА В 11-Й ДЕНЬ.**  
**СВЯТЫХ АПОСТОЛ ВАРФОЛОМЕЯ И ВАРНАВЫ**  
**НА ВЕЧЕРНИ**

Поем **Б**лажен муж: 1-й антифон. На **Г**осподи, воззвах: стихиры на 8, глас 4.

Подобен: **Я**ко добля:

**М**режею словес твоих, \* Богоглаголиве апостоле, \* из глубины возвел еси суетства \* и лютаго безбожия \* мирския концы \* и привел еси Христу Богу верою, \* такую тебе благодать подавшему, \* яко Божественну ученику и тайноглагольнику, \* Варфоломее апостоле.

**С**олнце славы, тя Иисус, Бог наш, \* яко лучу, преславне, посла \* в мирская исполнения, \* крепко отгоняющую безбожия мглу \* и просвещающую всех, \* во тьме неведения сидящих, \* ихже наследники содела Света, \* Варфоломее Богомудре.

**П**овинуяся мановением, \* Егоже мановению всяческая повинуются, \* Сему же подобяся, \* яко правды Учителю, \* чашу смерти страсти ради крестныя, \* радуяся, испил еси \* и предстоиши желаний крайнему, \* Ангелом и апостолом сликовствуя, \* Варфоломее славне.

Стихиры, глас 1.

Подобен: Прехвальнии мученицы:

**В**арфоломее всечестне, \* Христа благовествуя, \* вселенную протекл еси, якоже солнце, \* потребляя всю зарями веры многобожия тьму, \* и ныне молися даровати душам нашим \* мир и велию милость.

**В**арфоломее славне, \* светел показася орган, \* действием Духа брячая, \* яко учением Божественным \* скорописца трость и честнаго писца быв. \* Емуже предстоя, написатися поющим тя \* в книзе животней помолися.

**В**арфоломее мудре, \* пищный поток устремися, \* каплями Божественныя благодати \* напаяя весь олядевший разум \* и множае прежде мглою одержимую мысль. \* И ныне молися предстати ми до конца \* плодоносну Спасови, премудре.

Ины стихиры апостола Варнавы, глас 4.

Подобен: Дал еси знамение:

**П**рият еси, апостоле, \* на демоны непобедимую власть и силу, \* о имени Христове, \* начала тьмы отгоняти, \* прошел еси землю, \* просвещая, якоже солнце, \* и, в Рим славный пришед, \* первее, славне, Христово проповедал еси \* спасительное пришествие.

**П**ервей благости \* и естественному и пребожественному \* житию подобяся, \* муж был еси благ, \* Варнаво, по существу \* и утешения сын подобием именуемь, \* нравов твоих благостию \* и ума чистотою \* Христов показался еси ученик искренний.

**О**рган, добре составлен \* деланием духовным, Варнаво, был еси, \* языком званию ты вверился еси, \* к познанию Христову наставляя \* словесы и деянии, \* и вся просветил еси \* исповедати истинное \* Иисусово Божество, \* Спаса душ наших.

### Слава, глас 6. Византиево:

**В**арнаво прехвальне, \* блистающий сосуде Святаго Духа, \* яко сын утешения, \* иже прежде Павла, \* седмидесятым учеником быв верх \* и с Павлом паки проповедава Евангелие концем. \* Темже и благодати слово дела исполнив, \* себе принесл еси всеплодие чисто \* Учителю твоему Христу. \* Моли всегда, апостоле славне, \* в мире спастися душам нашим, молимся.

### И ныне, праздника или Богородичен глас 6:

**К**то Тебе не ублажит, Пресвятая Дево; \* кто ли не воспоет Твоего Пречистаго Рождества; \* безлетно бо от Отца Возсиявый Сын Единородный, \* Тойже от Тебе, Чистыя, пройде, \* неизреченно воплощя: \* естеством Бог сый, \* и естеством быв Человек нас ради, \* не во двою лицу Разделяемый, \* но во Двою Естеству \* неслитно Познаваемый. \* Того моли, Чистая, Всеблаженная, \* помиловатися душам нашим.

### Вход. Прокимен дне. И чтения:

#### Соборнаго Послания Петрова (глава 1):

**Б**ратие, благословен Бог и Отец Господа нашего Иисуса Христа, Иже по мнозей Своей милости порождет нас во упование живо воскресением Иисус Христовым от мертвых, в наследие нетленно, и нескверно, и неувядаемо, соблюдено на Небесех вас ради, иже силою Божию соблюдени верою во спасение, готовое явитися во время последнее. О немже радуйтесь, мало ныне, аще лепо есть, прискорбни бывше в различных напастех, да искушение ваша веры многочиснейше злата гибнуща, огнем же искушена, обрящется в похвалу и честь и славу, во откровении Иисус Христове, Егоже не видевши, любите, и на Негоже ныне не зряще, верующе же, радуетесь радостию неизглаголанною и прославленною, приемлюще кончину вере вашей, спасение душам.

#### Соборнаго Послания Петрова (глава 1):

**В**озлюбленнии, препоясавше чресла помышления вашего, трезвящися совершенно, уповайте на приносимую вам благодать откровением Иисус Христовым. Яко чада послушания, не преобразующесе первыми неведения вашего похотении, но по звавшему вы Святому, и сами святы во всем житии будите. Зане писано есть: святы будите, яко Аз Свят есмь. И аще Отца называете, нелицемерно судяща комуждо по делу, со страхом жития вашего время жительствуйте, ведяще, яко не истленным серебром или златом избавистесь от суетнаго вашего жития, отцы преданнаго, но честною кровию, яко Агнца непорочна и Пречиста, Христа.

#### Соборнаго Послания Петрова (глава 2):

**В**озлюбленнии, молю, яко прищельцы и странники, отребатися от плотских похотей, яже воюют на душу, житие ваше имуще добро во языцех, да о немже клеветуют вас, аки злодеев, от добрых дел видевши, прославят Бога в день просвещения. Повинитесь убо всякому человеку созданию, Господа ради: аще царю, яко преобладающе, аще ли же князем, яко от Него посланным, во отмищение убо злодеем, в похвалу же благодетелем. Яко тако есть воля Божия, благодетелем обуздвати безумных человек невежество, яко свободни, а не яко прикровение имуще злобы свободу, но яко раби Божии. Всех почитайте, братство возлюбите, Бога бойтесь, царя чтите. Раби, повинуйтесь во всяком страхе владыкам, не токмо благим и кротким, но и строптивым. Се бо есть угодно пред Богом, аще совести

ради Божия терпит кто скорби, стражда без правды. Кая бо похвала, аще согрешающе, мучими, терпите? Но, аще добро творяще и страждуще, терпите, сие угодно пред Богом. На сие бо и звани бысте, зане и Христос пострада по нас, нам оставль образ, да последуем стопам Его. Иже греха не сотвори, ни обретесе лествь во устех Его. Иже укоряемь, противу не укоряше, стражда, не прещаше, предающе же судящему праведно. Иже грехи наша Сам вознесе на теле Своем на древо, да, от грех избывше, правдою проживем.

**На стиховне стихиры праздника. Аще ли пост, стихиры апостола, глас 1.**

**Подобен: Всехвальнии мученицы:**

**Во** всю землю изыде \* ваше спасительное вещание, \* Боговидцы апостоли, \* и просвети души заблуждшия, \* и Христу приведе человеки, \* просвещенныя благодатию. \* Темже молите \* даровати душам нашим \* мир и велию милость.

**Стих: Во всю землю изыде вещание их \* и в концы вселенныя глаголы их.**

**С**ветильницы пресветлии Христовы, \* сосуди чистейшии, \* зарю Духа, премудрии, верою вместившии, \* церковнии столпи, \* Небеса преславная, \* Божию славу возвещающая, \* Того молите \* даровати душам нашим \* мир и велию милость.

**Стих: Небеса поведают славу Божию, \* творение же руку Его возвещает твердь.**

**Я**зыки приведосте \* Христу Богу, блаженнии, \* избавленныя кровию \* на земли родитися благоволившаго \* и Крест и смерть \* волею претерпевшаго, славнии, \* Егоже ныне молите \* даровати душам нашим \* мир и велию милость.

**Слава, глас 8:**

**А**постоле Спасов, Варнаво прехвальне, \* приятелище веры, сыне утешения, \* тишино обуреваемых, \* непрестанно в памяти твоей дерзновение имея, \* моли в мире сохранитися душам нашим.

**И ныне, праздника или Богородичен, глас 8:**

**Б**езвестная Дево, \* Яже Бога неизреченно зачениши плотию, \* Мати Бога Вышняго, \* Твоих рабов мольбы приими, Всенепорочная, \* всем подающи очищение прегрешений: \* ныне наша моления приемлющи, \* моли спастися всем нам.

**Тропарь, глас 3:**

**А**постоли святии, \* молите Милостиваго Бога, \* да прегрешений оставление \* подаст душам нашим.

**Ин тропарь, глас тойже:**

**Я**зык огнедохновен в силе Духа приемше, \* во плоти пришедшее Слово проповедаете всюду, \* Егоже ради ов во главу усечен, \* ов же камением побиев, \* и есте апостольскому лику украшение, \* Варфоломее и Варнаво, \* темже память вашу почитаем и просим: \* молите Христа Бога подати нам грехов оставление.

**Слава, и ныне, Богородичен, глас тойже:**

**Т**я ходатайствовавшую спасение рода нашего, \* воспеваем, Богородице Дево: \* плотию бо от Тебе восприятою Сын Твой и Бог наш, \* Крестом восприим страсть, \* избави нас от тли, яко Человеколюбец.

## НА УТРЕНИ

На Бог Господь: тропарь апостолов, глас 3:

Апостоли святии, \* молитвe Милостиваго Бога, \* да прегрешений оставление \* подаст душам нашим. [Дважды]

Слава, и ныне, Богородичен, глас тойже:

Тя ходатайствовавшую спасение рода нашего, \* воспеваем, Богородице Дево: \* плотию бо от Тебе восприятоу Сын Твой и Бог наш, \* Крестом восприим страсть, \* избави нас от тли, яко Человеколюбец.

По 1-й кафизме седален, глас 1.

Подобен: Гроб Твой:

Лик духовный апостольский миру послася тайно от Бога Вышняго, \* и неволею страждущим врачеве явишася, \* Триипостаснаго единственне призывающе, \* Божественное воплощение Еммануила Господа мудре написаша.

Слава, и ныне, Богородичен:

Купину юже Моисей неопалиму виде, гору Божию, святой облак, \* сень нескверную, Богоприятную трапезу, палату высокаго Царя, \* всесветлую и непроходимую дверь, Дево, поем Тя.

По 2-й кафизме седален, глас 4.

Подобен: Явился еси днесь:

Светолучными сиянии, яко звезды, земныя концы просвещаете, \* Богоучении святаго проповедания, \* Небеснии таинницы Господни апостоли.

Слава, и ныне, Богородичен:

Теплое заступление сущим в нуждах, нашу помощь и к Богу пременение, \* Еяже ради тли избавихомся, \* Богородицу, вернии, ублажаем.

По полиелеи седален, глас 8.

Подобен: Премудрости:

Мрежею слова возвед из глубины неразумия, \* боголепно языки привел еси верою \* и, яко источник сый вод духовных, \* вселенную всю напоил еси благодатию. \* Темже и спасшиися тобою, Богогласе, \* яко друга тя ближняго Христова ублажаем, Варфоломее, воиюще ти: \* моли Христа Бога согрешений оставление даровати \* чтущим любовию святую память твою.

Слава, и ныне, Богородичен.

Степенна, 1-й антифон 4-го гласа.

Прокимен, глас 4: Во всю землю изыде вещание их, и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Всякое дыхание:

Евангелие Иоанна, зачало 67.

Во время оно, явися Иисус учеником Своим, востав от мертвых. И глагола Симону Петру: Симоне Ионин, любииши ли Мя паче сих? Глагола Ему: ей, Господи, Ты веси, яко люблю Тя. Глагола ему: паси агнцы Моя. Глагола ему паки второе:

Симоне Ионин, любиши ли Мя? Глагола ему: ей, Господи, Ты веси, яко люблю Тя. Глагола ему: паси овцы Моя. Глагола ему третье: Симоне Ионин, любиши ли Мя? Оскорбе же Петр, яко рече ему третье, любиши ли Мя; и глагола Ему: Господи, Ты вся веси, Ты веси, яко люблю Тя. Глагола ему Иисус: паси овцы Моя. Аминь, аминь, глаголю тебе, егда бе юн, поясашеся сам, и хождаше, аможе хотяше, егда же состареешися и воздежеш руце твои, и ин тя пояшет, и ведет, аможе не хоцеш. Сие же рече, назнаменуя, коею смертию прославит Бога. И сия рек, глагола ему: иди по Мне. Обращься же Петр, виде ученика, егоже любляше Иисус, во след идуща, иже и возлеже на вечери на перси Его, и рече: Господи, кто есть предай Тя? Сего видев Петр, глагола Иисусови: Господи, сей же что? Глагола ему Иисус: аще хощу, да той пребывает, дондеже прииду, что к тебе? Ты по Мне гряди. Изыде же слово се в братию, яко ученик той не умрет, и не рече ему Иисус, яко не умрет, но аще хощу тому пребывать, дондеже прииду, что к тебе? Сей есть ученик свидетельствующий о сих, иже и написа сия, и вем, яко истинно есть свидетельство его. Суть же и ина многа, яже сотвори Иисус, яже аще по единому писана бывают, ни самому мноу всему миру вместити пишемых книг. Аминь.

**По 50-м псалме стихира, глас 1:**

**Во** всю землю изыде ваше спасительное вещание, \* Боговидцы апостоли, \* и просвети души заблуждшия, \* и Христу приведе человеки, просвещенныя благодатию. \* Темже молитве даровати душам нашим \* мир и велию милость.

**Канон Богородицы со ирмосом на 6 и апостолов два канона на 8. Канон святого апостола Варфоломея, глас 2.**

**Ирмос: Во** глубине постла иногда \* фараонитское всевоинство преоруженная сила, \* воплощсея же Слово всезлобный грех потребило есть, \* препрославленный Господь славно бо прославися.

**Проведец** всех и Бог, ума твоего боговидно зря, избра и тя сочета лику апостольску, Варфоломее всехвальне, благодатию просветив сердце твое.

**Добродетелей** на высоту возшед, языком огнедохновенным огневидно разделением обогатился еси, яко Христов апостол, пришествием Утешителя, пребогате, нечестия хвастие поядая, и неразумия.

**Богоносен** уголь воистинну, Божественнаго Духа зарею разжжен, показался еси, прелести сено попадая, Варфоломее прехвальне, и просвещая верою сердца поющих тя.

**Богородичен: Чистая,** рцы, како доиши? Како же Мати была еси, девственными печатями сияющи? Не пытай бездны, непричастна естеством, испытай един всех Бог и Господь, Егоже и плотию родих.

**Ин канон святого Варнавы, глас и ирмос тойже.**

**Яко** муж сый благ и утешения сын явлься, души моя озлобление и греха душегубную печаль отжени, яко да, веселия исполнен быв, воспою тя.

**Одержим,** блаженне, чистым сиянием, прозябшаго от колена Иудова, пребогате, Христа Всецаря, от левитска сродства пришедша священна, закона же преложение проповедал еси.

Светлая твоя, премудре, жизнь, первая благодати и естественного существа показа бога ты втораго, еже отгуду ублажаема благодатьми, славне Варнаво, порождение Божественного утешения.

**Богородичен:** Отроковиц Божественный лик божественно в женах Тя добрую воспевае, Богородице Владычице, добротами украшену Божества: добротворительное бо Слово паче слова родила еси.

**Катавасия по уставу.**

### Песнь 3

**Ирмос:** Прощела есть пустыня, яко крин, Господи, \* языческая неплодящая, Церковь \* пришествием Твоим, \* в нейже утвердися мое сердце.

Яко дождь небесный, изсохшую, премудре, вселенную всю тьмою безбожия напоил еси, Боговидче досточудне.

Источник изыде спасительнаго пива, Варфоломее всечестне, и многосугуб плод принесл еси языком спасения, досточудне.

Солию благодати идольское уставил еси гноеие, всемудре, сладким словом веры сердца услаждая чтущих тя.

**Богородичен:** Едину Деву Тя и Матерь чтим, яко спасения Ходатаицу бывшую нам, Непорочная, и мир избавляющую молитвами Твоими.

**Ин, ирмос тойже**

Облак вольный, нам дождь носящий от источника благодати, виден был еси, Варнаво славне, и пищный поток напаяющий.

Различными одарована сиянии видящи Всесильнаго Духа власть, тайнам Христовым служителя, отлучи тя, прехвальне.

Просвещаеми благодатию Креста Твоего, Владыко, благославнии апостоли тебе языки верою приведоша, Варнава и Павел Богомудрии.

**Богородичен:** Явилася еси чистотою, яко крин, Владычице, посреде терния возсиявши зарями девства Твоего, Богородице Всечистая.

**Кондак, глас 3.**

**Подобен:** Дева днесь:

Господень был еси всеистинный служитель, \* апостолов же явился еси семидесятих первый, \* озарил еси и с Павлом проповедь твою, \* всем возвещаяй Христа Спаса, \* сего ради песнопении Божественную память твою, Варнаво, совершаем.

**Икос:** Сын Божий, соприисущный Духу, благоволением на земли плоть приемь, яко Человек, и страстию честною безстрастие дав, ты полагае, блаженне, апостола и вития веры, мудра в слове и досточудна, проповедника честна, языков учителя, Варнаво блаженне, и Троицы истинна поклонника. Темже возсия верным честная денница светлая, озаряющая твоя Божественная память, юже достойно совершаем.

**Седален, глас 8.**

**Подобен:** Премудрости:

Мрежею слова возвед из глубины неразумия, \* боголепно языки привел еси верою \* и, яко источник сый вод духовных, \* вселенную всю напоил еси благодатию. \* Темже и спасиися тобою, Богогласе, \* яко друга ты ближняго

Христову ублажаем, Варфоломее, вопиюще ти: \* моли Христа Бога согрешений оставление даровати \* чтущим любовию святую память твою.

**Слава, Варнавы, глас и подобен тойже:**

**С**ловесен показался еси, \* яко Небесную поведуя славу Божию чудес светлостию и силы лучами, \* неразумия ношь отгоня благодатию, богоразумия же лучи облистая концем. \* Темже светоносную и святую твою память славим днесь, вернии, и вопием ти: \* Варнаво всехвальне, моли Христа Бога грехов оставление даровати \* чтущим любовию святую память твою.

**И ныне, праздника или Богородичен:**

**Я**ко Всенепорочная Невеста Творцу, яко Неискусомужная Мати Избавителя, \* приятелище яко сущи Утешителя, Препетая, \* беззаконию мя суща скверное обителище и бесом игралище в разуме бывша, \* потщися от тех злодейства мя избавити \* и светлое жилище добродетелей соверши, Светоносная Нетленная, \* отжени облак страстей и Вышняго причастия сподоби \* и Света невечерняго молитвами Твоими.

**Песнь 4**

**Ирмос: Пришел еси от Девы, не ходатай, ни Ангел, но Сам, Господи, воплощся, \* и спас еси всего мя, человека, \* Тем зову Ти: \* слава силе Твоей, Господи.**

**У**празднил еси, крестом Господним ограждаемь, демонское сверепство, Варфоломее преизрядне, сих душегубительную прелесть отгнал еси проповеданием.

**С**вет мира, славы Божественныя сияние Христос тя показа, Варфоломее Богоприятне: всю бо просветил еси Богоразумием тварь, всеблаженне.

**В**озмутил еси языческая моря, апостоле, яко конь преизряден, колесница Слова быв, верою же погасил еси горькаго безбожия концы.

**Богородичен: И**сцеляя Евино ветхое преступление, в Тя, непорочную, Пречистая, вселися, всего мя человека обнови падшаго Пребожественный.

**Ин, ирмос тойже**

**П**оследуя повелением Владыки, апостоле Варнаво прехвальне, нищим раздал еси все твое имение, и Христов проповедник быв велегласен.

**Д**остигл еси добродетелей светлость конечную и, Павла обрет, Богогласнаго апостола, с нимже всем возвестил еси таинства глубину неизреченную.

**Я**ко солнце, претекая мира концы, Варнаво всечестне, зарелучными сиянии, Павлу последуя, просвещаешши словом благодати.

**С**опричастник страстей Спаса быв, Варнаво прехвальне, в Небесных селех с Ним прославляешися, паче ума веселия насыщаяся.

**Богородичен: Е**вы праматере клятва упразднися Тобою, Всенепорочная: воплощеннаго бо Слова родила еси Присносущнаго, благословеньми мир венчавшаго.

**Песнь 5**

**Ирмос: Ходатай Богу и человеком был еси, Христе Боже: \* Тобою бо, Владыко, к Светоначальнику Отцу Твоему \* от нощи неведения \* приведение имамы.**

**Н**есозданну Свету, нас ради в зданиих явльшемуся Христу, перводелно беседовал еси, к Нему пришед, апостоле, и Божественными зарями от Него просвещаемь.

**Я**ко роса Божия, человеком исцеление подаючи, в мире был еси, о Варфоломее преблаженне, и землю нечестия пророчески опроверг еси.

**К** первому Свету приступль, был еси свет второй: еже отуду сиянии и светолитии озаряемь, яко самовидец Слова, Варфоломее всемудре.

**Богородичен:** **Г**лаголы Твоя помняще, Тя ныне блажим: Тобою бо, Непорочная, блаженство обретохом и жизньию честною истинною обогатихомся.

**Ин, ирмос тойже**

**З**акона сень прешед и благодатию сияя, языком исполнение благовествуя, просветил еси, Богомудрый Варнаво, Христовым проповеданием.

**К**репостию державною Святаго Духа, апостоле, яве обложен, лукавствия духи низложив, от тех злодейства мир избавил еси.

**В**оиющего глас в пустых языцех был еси, мудре, Божественнаго воплощения непостижимое таинство возвещая всем, Варнаво пребогате.

**Богородичен:** **С**е во утробе, Богородице Пречистая, Христа Бога паче слова имела еси, якоже Исаия предрече, выше естества же Сего, Богородительнице, родила еси.

**Песнь 6**

**Ирмос:** **В** бездне греховней валяся, \* неизследную милосердия Твоего призываю бездну: \* от тли, Боже, мя возведи.

**Ч**удес благодать прием и исцелений обогатся детелию, Варфоломее всемудре, язык стада уловил еси.

**О**гненный твой язык, преславне, всяку прелесть, яко сено, попали, верных же просвети сердца Божественным проповеданием.

**И**сточника премудрости учителя имея, преславне, Слова Безначальнаго, мирскую обуил еси, Богопроповедниче, мудрость благодатию.

**Богородичен:** **П**аче естества, Дево, родила еси и вечнуещи Девою, являющи истиннаго Божества, Сына и Бога Твоего, образы.

**Ин, ирмос тойже**

**В**озсияв миру, Христе Боже, Правды Солнце, Владыко, якоже лучи сияющия, Варнаву и Павла возблистал еси.

**К**ореносечна секира был еси, оляденевшую прелесть секущи паче слова чудесы, Богоглаголиве Варнаво чудне.

**З**аконоположник показался еси благодати, яко ветхаго завета образы ко истинному явлению предлагая, Варнаво Богоприятне.

**Богородичен:** **Н**ебеса Прострый волею небо земное другое показа Тя, Богомати Пречистая, и, из Тебе возсияв, явися.

**Кондак, глас 4.**

**Подобен:** Явился еси:

**Я**вился еси великое солнце вселенней \* учений сияньми и чудес страшных, световодя почитающия тя, \* Варфоломее, Господень апостоле.

**Икос:** Яко небо, славу Божию вещая, виден был еси Духом Святым, апостоле Божовидче, и, яко солнце светло, явился еси миру, прелестное помрачение разгоня Божественною благодатию. Тем молю ти ся и мил ся дею: Божественными твоими лучами души моя ослепление, всебогате, просвети зеницы и слово тя пети даждь во отвержение устом моим в твоей днесь памяти, в нюже всяк верный, веселяся, хвалит тя, Варфоломее, Господень апостоле.

### Песнь 7

**Ирмос:** Богопротивное веление \* беззаконнующаго мучителя высок пламень вознесло есть, \* Христос же простре Богочестивым отроком росу духовную, \* Сый благословен и препрославлен.

Великое таинство, Варфоломее, Божественнаго воплощения миру явил еси, еже всем невместимое и непостижимое, едином же вместимо верным, несказаемо и веруемо.

Яко камень, пресвятый Варфоломее, чисте валяся, прелести утверждение крепко опровергл еси, Церкви же необоримое основание явлься, сохраняеши сию непоколебиму.

Божественное подобие, Варфоломее, добродетелей шаромъ, преблаженне, написал еси, отсюда апостол Божествен быв, всем проповедал еси Христово пришествие многопетое.

**Богородичен:** Грозд созревший, Егоже невозделанно, Чистая, возрастила еси, на Древе яко узревши повешена, вопияла еси: Чадо сладкое, мстоъ искаши, имже страстей пьянство отыметя.

### Ин, ирмос тойже

Свято Святаго, во святых почивающаго, Варнаво, проповедал еси Сына, собезначальна Отцу и сопрестольна, Человека бывша, нам спасение содевающа.

Лучи, блистающия Божественное сияние, Варнава всечестный и Павел Богоприятный, яко свет, исходят, просвещающия словом благодати язык всенаследие, христопроповедницы.

Радуетя днесь воспитавый тя, Варнаво, цветущаго слово благодатное, Христови ты прозябши, Богоблаженне. Егоже изменив, нынешняго пленения избави молитвами твоими.

**Богородичен:** Направляющи, Всечистая, мою жизнь, ко Твоему благоутишному пристанищу настави, Бога рождающа, благих источника, всем подающа верным независтную благодать.

### Песнь 8

**Ирмос:** Пещь иногда огненная в Вавилоне действия разделяше, \* Божиим велением халдеи опаляющая, \* верныя же орошающая, поющия: \* благословите, вся дела Господня, Господа.

Велие и мало, много же и умалено, Спасово Евангелие премудро научил еси. Велия и преславная сложенными глаголы всем назнаменал еси, Варфоломее Богомудре.

Якоже река, от Сиона исходя, церковныя сонмы напояеши, пребогате, и поток Божественныя пици испустил еси явленнейше, зовый: благословите, вся дела Господня, Господа.

**Божественных даров** яве светлейшими и великими яко апостол божественне украсился еси. Превосходит сан благославия всего, блаженне, сущее во человецех зримое благодатию.

**Богородичен:** Ум безстрастен в ложеснах Твоих единится человеку уму, Всечистая, плоти же дебельством подлетен быв, веков превышший. Тем Тя, Богородице, верою и любовию славим.

#### Ин, ирмос тойже

**Море** языческое возмутити Твоя кони, яко Благодетель, навел еси – Варнаву славнаго и Павла чуднаго, прелесть многобожную ученьми, Живодавче, благочестия отгоняция.

**Положи**, яко Бог, Утешителю Душе вседетельный, в Церкви Твоей светила сияющая, Твою силу проповедающая, Сыну же и Родителю зовущая: благословите, вся дела Господня, Господа.

**Облистал** еси светло, яко солнце, в мире, мысленному беседовав яве Солнцу, Богоприятне: разжегся бо сиянием, свет второй был еси, всем являя таинства силу.

**Землю** всю ученьми просветив, еже паче ума блаженство достойно улучил еси, в Небесных селех, Варнаво всечестне, венец благолепия от Владыки прием.

**Богородичен:** Да клятву первую погубиши и смерти осуждение древняя праматере, от Девы Богоматере Слово Божие родися, всем дарова безсмертие негиблющее.

#### Песнь 9

**Ирмос:** Безначальна Родителя Сын, Бог и Господь, \* воплощся от Девы, нам явися, \* омраченная просветити, собрати расточенная. \* Тем всепетую Богородицу величаем.

**Слова** быв самовидец и служитель, ученик же и проповедник боговиден, идеже ныне есть Слово, ты жити воистинну сподобился еси, якоже Сам обеща неложно Преблагий.

**Яко** ныне предстоя престолу Владыки твоего и отонудными зарями осияемь, о Варфоломее Богомудре, певцы твоя назирая, страстей избавляеши и различных обстоятельств.

**Сын** веры ради сподоблься быти Богу, отеческих наследник сокровищ был еси. О, великодарныя длани! О, дарования, ныне превосходящаго, Христа, прославльшаго тя, Боговидче всеблаженне!

**Богородичен:** Разумевше издалеча прозорливима очима, пророцы Тя вси провозгласиша, хотящую Матерь быти Вседетеля и всех Владыки. Тем Тя, Всепетую Богородицу, возвещаем.

#### Ин, ирмос тойже

**Свет** бывше добродетелию, апостоли, и Свету великому ныне предстояще, миру мир подати и нашу спасти Церковь, юже состависте, Владыку умолите.

**Витийскую** лютость премудрости твоя пламенем, Богоявление Варнаво, яве погасил еси, сияний Божественных, яко источник, внутрь имея. Темже всесвященный праздник твой почитаем.

**Верою** память твою совершающе ныне, апостоле, молитвенника ко Владыце ты предлагаем, разрешения просяще согрешений твоим прияти ходатайством, Варнаво всечестне, Богопроповедниче священне.

**Богородичен:** Яко утро обретесе утреннее, в житейстей нощи девства зарями сияющи, восток Солнца разумнаго правды нам явльши, Богомати Всечистая.

**Светилен.**

**Подобен:** Посетил ны:

**Апостолы** Христовы приидите, людие, воспоим, \* Божественнаго Варфоломея и Варнаву мудраго, проповедники веры, \* яко молящихся Христу о душах наших.

**Слава, и ныне, праздника или Богородичен:**

**Чистая** Владычице Святая и едина Муженеискусная, спасение и упование Ты, \* моли из Тебе рожденнаго Избавителя нашего \* спасти мир от лести, бед и скорбей.

**На хвалитех стихиры на 4, глас 4.**

**Подобен:** Яко добля:

**Правды** ты Солнце, \* Иисус, Бог наш, \* во вся мирская исполнения, \* якоже многосветлую лучу, \* Богомудре апостоле, положил есть, \* злобы мглу отгоняща \* и просвещающа омраченна сердца неразумием \* и страстей обдержанием, \* Варфоломее пребогате.

**Чистое** приятелище \* Троицы был еси, \* добродетелей светлостью облистаем \* и в сердца приемь, Варнаво, \* от Нея сияние, \* и просвещение, солнца светлейшее, \* в концы светло препосылая \* и просвещая во тьме седящая неразумия, \* Богоприятне.

**Якоже** облацы, блаженнии, \* во вся концы дождь искапаете Небесный \* и души верных напоете \* Божественною благодатию, \* потопивше лютаго безбожия плевелы \* и совершивше души плодоносны человеческия, \* сего ради во хвалении вас почитаем, \* Господни апостоли.

**Слава, глас 5. Византиево:**

**Премудрость** Божия, \* соприносущное Слово Отчее, \* якоже во Евангелиих предрече: \* вы есте изобильныя лозы, прехвальнии апостоли, \* иже грозд зрелый и красен во ветвях ваших носяще, \* Егоже, вернии, ядуще, услаждаем вкус к веселию. \* Варфоломее Богоприятне \* и Варнаво, сыне утешения, \* прилежно молитесь о душах наших.

**И ныне, праздника или Богородичен:**

**Блажим** Тя, Богородице Дево, \* и славим Тя, вернии, по долгу, \* град непоколебимый, \* стену неборимую, \* твердую Предстательницу и прибежище душ наших.

**Славословие великое и отпуст.**

## НА ЛИТУРГИИ

Блаженны от канона Варфоломея, песнь 3-я на 4. И Варнавы, песнь 6-я на 4.

**Я**ко дождь небесный, изсохшую, премудре, вселенную всю тьмою безбожия напоил еси, Боговидче досточудне. [Дважды.]

**И**сточник изыде спасительнаго пива, Варфоломее всечестне, и многосугуб плод принесл еси языком спасения, досточудне.

**С**олию благодати идольское уставил еси гноение, всемудре, сладким словом веры сердца услаждая чтущих тя.

**В**озсияв миру, Христе Боже, Правды Солнце, Владыко, якоже лучи сияющия, Варнаву и Павла возблистал еси.

**К**ореносечна секира был еси, оляденевшую прелесть секущи паче слова чудесы, Богоглаголиве Варнаво чудне.

**Слава:** Законоположник показался еси благодати, яко ветхаго завета образы ко истинному явлению прелагая, Варнаво Богоприятне.

**И ныне: Богородичен:** Небеса Прострый волею небо земное другое показа Тя, Богомати Пречистая, и, из Тебе возсияв, явися.

### Тропарь, глас 3:

**А**постоли святии, \* молитв Милостиваго Бога, \* да прегрешений оставление \* подаст душам нашим.

### Ин тропарь, глас тойже:

**Я**зык огнедохновен в силе Духа приемше, \* во плоти пришедшее Слово проповедасте всюду, \* Егоже ради ов во главу усечен, \* ов же камением побиев, \* и есте апостольскому лику украшение, \* Варфоломее и Варнаво, \* темже память вашу почитаем и просим: \* молитв Христа Бога подати нам грехов оставление.

### Кондак Варнава, глас 3.

**Г**осподень был еси всеистинный служитель, \* апостолов же явился еси седмидесятих первый, \* озарил еси и с Павлом проповедь твою, \* всем возвещая Христа Спаса, \* сего ради песнопении Божественную память твою, Варнаво, совершаем.

### Кондак Варфоломея, глас 4.

**Я**вился еси великое солнце вселенней \* учений сияньми и чудес страшных, световодя почитающия тя, \* Варфоломее, Господень апостоле.

**Прокимен, глас 8:** Во всю землю изыде вещание их, - и в концы вселенныя глаголы их.

**Стих:** Небеса поведают славу Божию, творение же руку Его возвещает твердь.

### Апостол Деяний, зачало 28.

**В**о дни оны, разсевшиися апостоли от скорби, бывшия при Стефане, проидоша даже до Финикии, и Кипра, и Антиохии, ни единому же глаголюще слова, токмо пудеем. Бяху же нецыи от них мужие кипрстии и киринейстии, иже вшедше во Антиохию, глаголаху к еллинном, благовествующе Господа Иисуса. И бе рука

Господня с ними: многое же число веровавшие обратишася ко Господу. Слышано же бысть слово о них во ушию церкви сущия во Иерусалиме, и послаша Варнаву преити даже до Антиохии. Иже пришед и видев благодать Божию, возрадовася и утешаше вся изволением сердца терпети о Господе. Яко бе муж благ, и исполнь Духа Свята и веры. И приложися народ мног Господеви. Изыде же Варнава в Тарс възискати Савла, и обрет его, приведе его во Антиохию. Бысть же им лето цело собиратися в церкви, и учити народ мног, нареци же прежде во Антиохии ученики, Христианы. От ученик же, по елику кто имеяше что, изволиша кийждо их на службу послати живущим во Иудеи братьям, еже и сотвориша, пославше к старцем рукою Варнавлею и Савлею

**Аллилуа. глас 1:** Исповедят небеса чудеса Твоя Господи, ибо истину Твою в церкви святых.

**Стих:** Бог прославляемь в совете святых.

### Евангелие от Луки, зачало 51.

**Рече** Господь Своим учеником: слушаый вас, Мене слушает, и отменяйся вас, Мене отменяется, отменяйся же Мене, отменяется Пославшаго Мя. Возвратишася же семьдесят с радостию, глаголюще: Господи, и беси повинуются нам о имени Твоем. Рече же им: видех сатану яко молнию с небесе спадша. Се, даю вам власть наступати на змию и на скорпию и на всю силу вражию, и ничесоже вас вредит. Обаче о сем не радуйтесь, яко дуси вам повинуются, радуйтесь же, яко имена ваша написана суть на небесех. В той час возрадовася духом Иисус и рече: исповедаются, Отче, Господи небесе и земли, яко утаил еси сия от премудрых и разумных, и открыл еси та младенцем, ей, Отче, яко тако бысть благоволение пред Тобою.

**Причастен:** Во всю землю изыде вещание их, и в концы вселенныя глаголы их.